



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 61. redovnoj sjednici održanoj 22. aprila 2020. godine, usvaja

## **ZAKON**

### **O IZMJENI I DOPUNAMA ZAKONA O ZDRAVSTVENOJ ZAŠTITI U BRČKO DISTRIKTU BOSNE I HERCEGOVINE**

#### **Član 1**

(1) U Zakonu o zdravstvenoj zaštiti u Brčko distriktu Bosne i Hercegovine – prečišćeni tekst (Službeni glasnik Brčko distrikta BiH, broj 52/18) u članu 72 stavu 2 iza tačke b) dodaju se nove tačke c) i d) koje glase:

„c) lica koja imaju manje kvalifikacije i manje radnog iskustva od rukovodnog organa javne zdravstvene ustanove, kojeg biraju,

d) lica koja su u radnom odnosu u toj javnoj zdravstvenoj ustanovi,”

(2) Dosadašnje tačke c) i d) postaju tačke e) i f).

#### **Član 2**

(1) U članu 74 stavu 1 iza tačke k), dodaje se nova tačka l) koja glasi:

“(l) najmanje dva puta godišnje izvještava osnivača o svom radu;”

(2) Dosadašnje tačke l), m), n) i o), postaju tačke m), n), o) i p).

(3) Iza stava 4, dodaju se novi stavovi 5, 6 i 7 koji glase:

“(5) Godišnji program rada javne zdravstvene ustanove, za narednu kalendarsku godinu, upravni odbor mora uputiti Vladi, radi dobijanja saglasnosti, najkasnije do kraja tekuće kalendarske godine.

(6) Izmjene i dopune akata javne zdravstvene ustanove, koje je osnivač donio ili na koja je prethodno dao saglasnost, mogu se izvršiti samo uz prethodnu saglasnost osnivača.

(7) Svi pravilnici javne zdravstvene ustanove, kao i njihove izmjene i dopune, kojim se regulišu: plate, naknade, topli obrok, dnevnice i druga primanja, donose se uz saglasnost osnivača.”

#### **Član 3**

U članu 75 iza stava 3 dodaje se novi stav 4 koji glasi:

“(4) Naknada iz stava 3 ovog člana, utvrđuje se do iznosa jedne prosječne neto plate isplaćene u Brčko distriktu BiH, za prethodnu godinu.”

## **Član 4**

Član 76 mijenja se i glasi:

### **“Član 76**

**(Razrješenje članova upravnog odbora)**

(1) Osnivač razrješava članove upravnog odbora prije isteka perioda na koji su imenovani:

a) na zahtjev člana;

b) ukoliko član više ne ispunjava uslove za članstvo,

c) ukoliko član ne izvršava svoje obaveze i dužnosti u skladu sa Zakonom, aktom o osnivanju i statutom zdravstvene ustanove i drugim važećim propisima,

d) ako godišnji program rada javne zdravstvene ustanove nije upućen u proceduru u skladu sa zakonom,

e) ako Vlada ne usvoji izvještaj o poslovanju javne zdravstvene ustanove.

(2) Odluku o razrješenju člana upravnog odbora javne zdravstvene ustanove donosi Vlada, uz saglasnost Skupštine.

(3) U slučaju prestanka članstva u upravnom odboru jednog od članova, mandat novoizabranog člana upravnog odbora traje do isteka mandata svih ostalih članova upravnog odbora.”

## **Član 5**

(1) U članu 86 stavu 4 brišu se riječi: “naknadu za rad,“, te se iza stava 4 dodaje novi stav 5 koji glasi:

“(5) Mjesečna naknada za rad, članovima nadzornog odbora javne zdravstvene ustanove, može iznositi najviše do 70% jedne prosječne neto plate isplaćene u Brčko distriktu BiH, za prethodnu godinu.

(2) Dosadašnji stav 5, postaje stav 6.

## **Član 6**

(1) U članu 87 iza stava 3 dodaje se novi stav 4 koji glasi:

“(4) Nadzorni odbor javne zdravstvene ustanove, najmanje dva puta godišnje, izvještava Skupštinu o svom radu.”

(2) Dosadašnji stav 4 postaje stav 5.

## **Član 7**

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-849/20

Brčko, 22. 4. 2020. godine

**PREDSJEDNIK  
SKUPŠTINE BRČKO DISTRIKTA BiH  
Esed Kadrić**